

Inatsisartut Suleriaasianni § 33, imm. 3, nr. 1 malillugu Nunat Avannarliit Killiit Siunnersuisoqatigiiffiannut aallartitat siulittaasuata aalajangiiffisassatut siunnersuut tulluuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 2/2025-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni naalakkersuisunut Islandimilu naalakkersuisunut kaammattuutigaa,

- Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut, internettimut nalunaarasuartaatitigullu attaveqaatinut, akisussaasut naapissasut Atlantikullu avannarpasinnerusortaani attaveqaqatigiinnermut internettimullu attaveqaasersuutit inuiaqatigiinnut pingaarutillit, minnerunngitsumik imaatigut kabelit qaammataasatigullu attaveqaatit, isumannaassusiat oqallisiginarlugu,
- Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut akisussaasuusut naapinnerminnut atatillugu misissussagaat Atlantikup avannarpasinnerusortaani nunat imaatigut kabeli qaammataasatigullu attaveqaataat eqqarsaatigalugit sillimaniarneq upalungaarsimanermullu pilersaarutit pillugit suleqatigiinnissamut tunngavissaqarneris.

(Aallartitat siulittaasuut Kim Kielsen)

Tunngavilersuut

Imaatigut kabelit nunani avannarlerni killerni nunani inuiaqatigiinnut annertooujussuarmik pingaaruteqarput. Kabelit pineqartut ajoquserneqarpata tamanna ilungersunartunik kinguneqarsinnaavoq.

Inuiaqatigiit nutaaliaasut ingerlanneqarnerannut internetti attaveqaqatigiinnerillu immap naqqani kabelit aqqutigalugit ingerlanneqartut pinngitsoorneqarsinnaanngillat. Inuiaqatigiinni attaveqaasersuutitut pingaarutilinnut, soorlu aningaaseriveqarnerup, peqqinnissaqarfiup upalungaarsimanerullu iluini qarasaasiatigut periaatsinut, imaatigut kabelit aqqutigalugit attaveqaqatigiinneq pinngitsoorneqarsinnaanngilaq.

Nunani avannarlerni killerni nunat imaatigut kabelit eqqarsaatigalugit sunnertiasumik inissisimapput. Nunarsuarmi sumi inissisimanertik pissutigalugu nunarsuatsinni sumi inissisimaneq tunngavigalugu naalakkersuinikkut ingerlatsineri immikkuullarissuupput, Assersuutigalugu Kalaallit nunaat piffissami kingullermi nunat tamalaat akornanni oqallinnermi annertuumik sammineqarsimavoq. Taamaattumik attaveqaasersuutit isumannaatsuunissaasa qularnaarneqarnissaat pisariaqarpallu amerlinissaat aatsaat taamak pingaaruteqartigilersimavoq.

Nunat pineqartut akornanni imaatigut kabelit amerlanngillat. Ajournerpaamik pisoqarpat nunamut ataatsimut arlalinnulluunniit aqqutit ataatsikkut kipineqarsinnaapput, taamaalillunilu nunat pineqartut avammut attaveerutissallutik. Tamatumunnga sanilliullugu Europap nunavittaani taamatut pisoqarsinnaanera ilimanarpallaanngillat nunat imminnut qaninnerat pissutigalugu.

Savalimmiunut imaatigut kabelit pingasuupput. Kalaallit Nunaannut marluupput Islandimullu sisamaallutik. Imaatigut kabelit taakku illersorneqarnissaat nunani avannarlerni killernilu nunat akunnerminni attaveqaqatigiinnermut atortulersuutaata nukittorsarneqarnissaat pingaaruteqarpoq. Taamaattumik

siunnersuutigineqarpoq inuiaqatigiinni attaveqaasersuutitut pingaarutilinnut nunani avannarlerni killerni nunani naalakkersuisunut ilaasortat naapissasut pineqartullu eqqarsaatigalugit periusissiat suliaasaqarfimmilu suleqatigiissinnaaneq eqqartorlugit.

Immap naqqatigut kabelit kipsisineqassagaluarpata, apeqqutaatinnagu tamanna pinngortitap nammineq pissusiinik, aserorterinermik saassunneqarnermilluunniit pissuteqarnerseq, qisuariarnissaminnut nunat avannarliit killiit piareersimasariaqarput. Siunnersuutigineqarpoq naalakkersuisut ilanngullugu oqallisigissagaat immap naqqatigut kabeli kabelilluunniit arlallit ataatsikkut kipineqartillugit tamanna qanoq pitsaanerpaamik qisuariarfigineqarsinnaanersog.